

簡松草堂詩集

簡松草堂詩集卷十二

錢唐張雲璈仲雅

望仙曲

碧城十二珠宮妥門外靈桃花似火大海濤迴涌  
紫瀾萬里蓬山綠雲鎖有人同注崑崙籍也貯丹  
砂煉金液瑤想璫思幾歲年忽覺仙凡一時隔欲  
跨赤鯉隨琴高凡魚不向滄溟遨又欲呼龍種瑤  
草空對蘼蟲怪牙爪霓旌羽蓋不飛來一片琅璈  
徒縹緲淮南豈是天帝賓每怪上天稱寡人武夷  
縱有幔亭宴恐我不比曾孫親鷺鴨小兒健雙脚

閬苑一書還附鶴煙火生來不療飢乞許仙廚恣  
大嚼長河藻元都葱紫琳朱蜜芝房紅嫌山甜雪  
餐不得太行青泥焉可食直應飽捋羊鬚珠莫使  
人閒味雞肋

斷炊戲作

張融張融汝何瘖有米長安不能索夜臥已覺腸  
雷鳴曉起還看爨煙寂論文未貯胸萬卷說事原  
慙喙三尺山頭但作飯顚嘲世上安知鳥羽擇梁  
鴻滅竈不因人馮驩彈鋏長爲客空倉有雀苦朝  
飢涸轍一魚作忿色旣無大案奉征羌安得碎金

享越國量沙豈容比道濟囊土直欲學祖逖盤游  
雖美但朶頤麤糲加餐休蹙額每緣留客諱雙弓  
豈僅選官輕一擲新樣何時見二紅折簡無人設  
三白平原工書亦徒爾陶令折腰空太息脫粟敢  
笑公孫餐霑飯時同坡老喫吁嗟乎胡奴一船未  
蒙惠子敬兩困誰施德門東稚子休更啼會須萬  
里飛而食

杭州往還雜句十七首

兩隄秋柳尙穆穆十幅西風力正酣逢著還鄉心  
便喜朗吟飛過大江南

芙蓉湖上易句留回首前時感舊遊三十年來詩

畫手楊吳俞鮑總山邱

過無錫有感楊苞文吳斧仙俞是齋鮑若洲四君皆

工詩俞鮑尤善畫俱先後物故楊子姊壻也

臨溪溪水碧潈洄認得柴扉一半開幾度吳羌山

下過更無人識寓公來

過德清

主人憐我滯天涯許占東頭暫當家不道浮身無

倚著年年來伴紫藤花

予每歸杭必舍于山用表兄家東偏有屋三楹藤花

覆其前予輒宿于此

湖水空明上碧霄多情臺榭若爲招故山莫怪長

爲客抵死歸來踏六橋

年來頻作故鄉人曾占精藍住兩春合十山僧解

迎客憐渠臥佛也疲津

過葛林園舊寓

邂逅湖塘笑語歡故鄉且復暫團樂杜陵舊識雲

卿面不許尋常把臂看

湖上遇仇一鵬李我洲兩孝廉李時居中丞幕中不

復再見

拜墓歸來轉斷魂古原荒草夕陽昏紙灰未冷仍

爲客泉下慈親久倚門

抱山堂集梓初成朱叟騷壇舊主盟羨煞名山傳

不朽釀錢爲壽有門生

錢唐朱青湖工詩六十初度門下士釀錢梓其稿以

爲壽

城曲茅堂水一涯亭臺猶占四時花重來已覺荒

蕪甚空認當年給諫家

借梁念閭遊城曲茅堂俗名金衙莊二十年前爲孫

給事牧堂先生別業曾一至其地今已再易主矣

乍覺雷轟放牘天東牀初預鹿鳴筵阿翁自笑頽

唐甚還對簪花憶少年

喜金壻潤生鄉薦

選舞徵歌出意新桂香叢裏宴嘉賓不知此夕寒

牕下多少秋風灑淚人

放牘日行葦堂夜宴

山公書錄已無多學士重編亥豕訛不是仇香留

直筆爭教遺集不銷磨

錢唐馮山公有集久散佚盧抱經學士刻書最精仇

一鷗有句云盧郎枉自精讐校不刻山公一卷書學士見之瞿然因搜羅付梓學士山公外孫也

太常門第舊清芬，賸有遺發白髮紛。此日登堂誰

拜母，絳紗空老宋宣文。

風涇程太常先大夫同年友，又爲婚姻夫人宋氏年

八十無子，貧病且雙目失明，無人贖卹，子每登堂拜之，爲之慨然。

紆如街鼓夜燈紅，惆悵金閨路不通。廿載門人私

淑意，未曾牀下拜龐公。

夜過吳門，不及入城謁王西莊先生。

牽絲人去意難攀，忽漫相逢別緒刪。百里姑蘇臺

下水，送君直過九龍山。

許墅遇費堯峰同年時謁，選入都同行，至無錫予欲

入城因別去。

少年公子擅清狂，欲躡丹梯斫桂香。一夜罡風吹

玉折，頓教鬼火掩文光。

重過錫山，悼穉生相孫樵生以貴公子讀書善屬文。



下第抑鬱不數日遽卒人咸惜之

### 風雨泊老埧口

蕭瑟風吹夜淋浪雨洗年客懷中歲後歸夢大河  
邊寒逼銀燈細愁依角枕偏欲書驢券去且復戀  
吳船

### 趵突泉

爾雅釋濫泉其狀爲正出如人口有銜開闔見出

沒

爾雅釋水濫泉正出正出涌出也逸雅云濫銜也如人口有所銜口闔則見也我遊歷

城西有泉名趵突從來水濶下此獨爲上溢乍疑  
人擊之致令過顙疾又疑漢陰機地底弄詭譎鯨

人泣成珠拋散自潛室蟄龍不行雨張口噓細沫  
飛乳五百道倒向城上將我讀南豐記試爲徵其  
實源流出黑水入地行汨汨何人棄稊稗復此見  
瑣屑其泉每冬溫芳草寒猶發皆見曾文昔聞安豐泉  
涌現隨叱咄寰宇記安豐軍泉在淨戒寺北人至  
涌愈甚安知卓地呼不噴千丈雪其事未經見其理  
焉可述且汲烹露團消此黃塵渴

省兄津門二首

今夜天涯雁雙栖不覺寒朔風吹短影春色近長  
安小住仍爲客清貧莫厭官惟憑一尊酒且作故

鄉看

喜極翻成涕離多又抱愁不堪三載別只許二旬  
留苦語燈無燄鄉心月似秋對牀眠未穩敲枕聽  
更籌

吳門席孺人綠牕遺稿爲屈闇齋題兼慰  
公子元安

玉皇宮中少才子緋衣乘蚪召女史琴川夫人赴  
玉樓夢讀丹符書一紙仙閨寧許戀塵寰只合瑤  
臺充帝使千年天上說長生萬口人閒傳夭死三  
閭苗裔是夫郎幾度招魂到蘭芷已知永訣隔銀

河那禁神傷擁翠羅孫楚樓前明月迴安仁室裏  
墨痕多墨痕空識心頭恨明月難消臉畔波此際  
有情誰共語此時無計奈愁何金釧香殘寶釵冷  
腸斷蕭郎淚如綆彈指春風卅載餘至今不見幃  
中影劇憐笑語杳難追惟有遺編重堪省二十三  
詩十五詞一一明珠工且整思親心逐白雲飛懷  
姊夢依芳草醒斷金零翠好收藏祇惜華年天不  
永莫嫌佳句本無多留與凡塵應不肯無人躡足  
到瑯嬛手寫霞牋向空請若從仙籍校篇章著作  
懸知身可等藁砧已是心如結阿侯更灑西風血

兩月空餘枕畔啼三年不向懷中活文葆留裁繡  
閣花麻衣低埽孤墳雪墮地先爲失恃人立身誰  
是揚名日儀容夢裏認難真懿行生前聽未悉灌  
佛空將金鏡投讀書誰把熊丸設縑素還憑阿父  
心蓼莪早結旁人舌傷心栢棧已難尋況對遺詩  
泣滿襟常看崔九臨風倒怕見臯魚抱樹吟荻畫  
更無歐母字橘懷惟賸陸郎心生來慈竹無餘蔭  
聽到啼鳥是苦音省兄兩度津門到季子還鄉餘  
緡纒邂逅君家父子賢行觴割炙來相勞識面先  
從客座看放懷共取明燈照酒邊投我軸如杵多

少名流共矜許未曾啟口貌已恭邀我題辭從後  
補多才公子氣昂藏他日凌雲事表揚縱無萱草  
花千朶定有金羅紙七張末坐相如終局促效顰  
西子更彷徨露香一集空存篋對此慙顏汗似漿  
先人露香書屋詩草尙藏於家無力付梓對此悚  
然

癸丑六月十二日李齋生教授生孫周晬  
適無錫王西園侍御過訪侍御祖贈公某  
亦任揚州教授侍御五齡隨任於此今來  
學舍重歷舊遊追憶曩昔越五十七年前  
後若巧相映者教授賦詩屬同人賡和江

都薛松巖又爲之補圖因作長歌以紀其

事

去年得孫與君共

子先君二十日得第三孫饒

君家孔釋應抱

送渥水看騰神俊駒丹山乍起新雛鳳今年六月

醉盤試提戈弄印將來事忽聞門外車馬喧傳是

梁溪侍御至梁溪侍御釵鏤家乃祖於此開絳紗

寒璫對客官獨冷講堂列坐人無譁其時侍御才

五歲鬚髻綠髻方梳丫春風融吹竹馬跡槐陰涼

覆羅襦花重來遊蹟還堪睹猶是當年嬉戲所已

教拾級上堂階不惜周行向廊廡感慨應從今日

深廢興更爲暑年數翻疑白鶴返令威錯認金環  
探羊祜彈指流年五十七往日不來來此日適逢  
其會定有因繡衣文葆光同溢侍御有兄佐達州  
謂變公先生與我交作忘年遊詼諧語每傾座客嘯傲

氣欲橫金秋兩昆太公皆在養大椿蔭滿東西頭  
孫曾森森如立竹馬糞盡識諸王優君家郎君誠  
大器況復生兒頭角異我來祝兒不他贅卽以王  
家相比例不必遠刺秦中地亦不必行行驄馬避  
只要連縣取科第更須壽考常相繼先生四十早  
成名一官何惜長匏繫眼前如此足快意吁嗟乎



眼前如此足快意只恐文章他日假手時詒厥翻  
爲到公戲用南史到蓋事

夜坐感懷兼憶天津

曲曲腸迴不暫停年來蹤跡太飄零  
春愁日下連三月涼夜天邊看九星  
天津九星在女星上姚廣孝占應小直沽作客  
已憐頭共白論交難得眼長青  
一行新雁驚寒後從此秋聲又滿庭

輓江秋史侍御二首

名德量庚子膺眼儀徵人

天上行驄馬人間降玉棺  
陛依丹鳳遠臺繞夜鳥寒  
白屋貧猶在青雲路共看可憐生死別八口

滯長安

公丁父憂服闋將還京師

朝遽卒眷口尙留

不識荊州久今年兩地逢

今春予至津門侍御方主問津書院流連竟月

夏間返揚而公亦先歸

八分憐次仲

公善隸病中猶爲予書聯

百尺仰元

龍魂藉巫陽索心傷瘡鬼攻小東門外路無復更過從

題梁蛾子空山獨往圖

君好道裝講求服食之法

梁生不屑居塵界舉首時時向天外入山惟恐山不深心空於山覺山隘羽衣拂拂披天風手攀古薜攀長松一雙芒屨一塵尾穿破白雲千萬重白雲亦是人間路只恐雲深行易誤偶然咳唾落九

天山下人看不知處我聞子晉吹玉笙王喬控鶴  
空中行又聞三神山可到海日曛曛常照耀飛行  
絕跡信有然此中自可求真仙梁生梁生爾不學  
拔宅白日昇青天又不學騎魚碭水二百年浮邱  
袖洪厓肩壺公桂父相後先紫芝朝餐嘖春露白  
石夜煮飛涼煙胡爲山中苦幽獨豈愛此山看不  
足山中之人厭麋鹿道是君來結茆屋似聞阮籍  
嘯蘇門欲對子真呼鄭谷王孫招隱小山桂將軍  
問訊東橋竹定隨蔣徑伴羊求何須甫里尋皮陸  
嵩嶺應知石室閒武陵翻笑桃花俗今之畫圖疑

此屬君方笑言豈我欲餐霞漱液定有人丹崖翠  
壁常相親瑯書讀罷恣游戲仙骨早具君之身不  
必服食傳登真亦不必熊經而鳥申但遇瓊漿須  
飽喫羊鬚有珠莫輕摘太行青泥髓母令化爲石  
君家門風鍛鏤飾甲第連雲光奕奕自應聞譽在  
金闕豈許馳名占玉籍坐忘須識五時難入道終  
疑雨塵隔仙靈窟宅倘許遊我亦來觀爛柯奕

輓柳柳泉

秋霜昨夜損紅蓮幕府虛傳庾杲賢夢去醫難爲  
二豎病來艾已服三年庭階早失臨風玉

去歲喪子圖

畫真成采藥仙

君善病嘗  
畫采藥圖

蕉萃江潭一株柳誰歌

殘月弔屯田

連日得戚友之訃感悼賦此

風急虞歌滿耳哀故人聯袂入泉臺難禁噩夢連  
宵惡猶作傳聞一例猜老屋燈青山鬼泣寒林月  
黑訓狐來大招欲賦知何處費盡江南宋玉才

次韻梁溪王涵齋先生癸丑重遊泮宮六

首

泮水鸞旂事又新傳來佳話徧湖濱却從髦士班  
中秀忽見耆英會上人白髮自尊當代齒青衫猶

戀舊時身卽看桃李陰初滿相映寒松萬古春  
鏗鏘猶說講帷經精義羣推是考亭未許神駒誇  
躡影却看老鳳又揚翎數來輩行應如雨聚到英  
才豈似萍留得魯靈光殿在底須回首問前型  
六十年過說舊遊當時先路認驊騮德星聚處常  
相見碩果生來大有秋久識家聲傳後起早將文  
字壓名流梧桐本是龍門種添得孫枝葉葉稠謂先  
生家二新秀才

茂才猶是憶前程辛苦分明對一檠入座尊如龔  
祭酒著書老識趙臺卿伯兄早舍先師菜令兄圖南先生

先五年亦鄉黨驚齊大父名多士卽今看濟濟雁  
重遊洋宮行應動昔年情

繡衣扶杖侍行吟珍重陔蘭祿養心

謂令嗣西園侍側足

下泉流雙鏡合船頭山色九龍深吳鉤已吐干霄  
氣方響終思躍水音橐筆若教重入試也應人識  
伯牙琴

神仙行地拜

絲綸

壽域長教養大椿銅狄幾

經摩故物古書早自識先秦科名相映三株樹人

物爭看獨角麟憶著吾鄉前事近袁盧稱徧里中

民

近年丁未壬子吾鄉袁簡齋盧抱經兩先生皆有重遊洋宮詩

哭梁夫菴一百二十韻

名履繩字處紫錢唐人戊申舉人

寒雲壓空蒼愁色亘一抹陰風挾靈爽恍若動咤  
叱客懷慘不樂對此生凜慄忽聞打門來急足千  
里逸探懷投素書濕淚裏猶熱開緘讀未終我氣  
先已結哀哉梁孝廉從此竟永訣鬼殺謝宏微帝  
召李長吉其中恩怨理不知誰所律世無此等才  
天或閒世出既有此等才天又輕摧折始知天無  
情無復爲區別智愚賢不肖一死天事畢遂令瓊  
樹枝盡作寒煙滅巍巍君甲第過者仰閥閱大父  
作相公阿耶居九列世父官翰林螭坳近清切看



君多貴氣早具封侯骨作文能如虹觀書眼似月  
隸事物并將談經席可奪詩從解頤聽易能鑿語  
說早刮先輩目共擣俗儒舌書案不離肘木榻總  
當膝翩翩佳公子於此見卓越始識王景文可觀  
到哺歎但爲龍鳳優豈有虎豹劣阿兄精史事君  
亦同著述兄攻腐遷瑕君入盲左室令兄諫菴作  
史記志疑三  
十六卷君亦爲左通今志  
疑已行世而君書尙存篋證佐旣與衍部分亦精  
密發口如懸河落筆可屈鐵欲於服杜外獨以偏  
師師今年 詔旨下深辨胡傳失取士宗素臣功  
令昭若揭人言君學昌此似爲君設安知經義顯

受知不特達抱蘊未一抒而乃化異物君書卷帙  
繁近聞業已卒自當屬君孤早晚付剗劖我母君  
祖姑夙附葭莩末例以輩行親亦忝在叔姪平時  
志趣合意氣每相匹君身比我長君言比我訥君  
性比我緩君好比我質只此微不同餘亦類大率  
惟其淵雅才我乃望塵蹙落落戚友閒於我最親  
暱勛以青雲階資以黃金鑊憐我稍稔頻君自忘  
被黜聞我旅況囁君貌已蹙類在昔一飯恩事尙  
錄瑣屑況乃知己懷重疊詎可沒君生歲在戊我  
齒長君一君年四十六我年四十七茫茫已在視

星星已在髮每用向君言只恐衰至忽看君却不  
然顏色頗自悅兩鬢長留青雙瞳尙點漆胡爲康  
彊身事變起倉猝感我年相若對此殊自愧輸他  
草木姿尙待春風發君葬其先人我往助執紼手  
自開元堂牛眠卜同穴附梓事必誠負土力易竭  
營營晝夜閒不肯少自佚深山足風寒食飲復不  
節所中在隱微一發不可遏魂借巫陽招命難夢  
豎脫世無秦越人何處望生活君今死於孝於世  
亦何怛惟憐馬鬣封心事尙未訖我聞青鳥言說  
地甚奇譎自當致福應何乃召禍烈陰陽固虛無

莫可致窮詰殲我良人良頗疑術士術君家父與  
母神明定專壹宜貸君一死共向司命乞如何坐  
不救得毋慈意汨果愛柏與松不復子弟恤春時  
赴公車與君同螻屈我書且十上君足亦三刖我  
居甥館寒君依蕭寺潔朝看樹烏飛暮聽櫪馬齧  
行吟每聯襪供飲或投轄雖在落魄中頗自見矣  
兀努力誓心期冀步天衢闕前事已如此後願更  
何必自我客揚州僂指幾鷓鴣年年思歸心所欲  
甚飢渴如瞽未忘視如蔭不到喝如萍水中浮如  
旌竿上綴望鄉比望歲離家等離筭轉瞬十八年

世事風花瞥眼得半宅典與君來往迭君死反如  
歸我行尙或尼迢迢凶問來日月無悅惚仲冬哉  
生明於此見緜遐憶當丁未歲喪母我孤子君時  
涉江弔扁舟犯風雪相見語未交相持泣已噉此  
情宛在目思之動哽咽豈意君今亡與母同忌日  
前月故鄉人帶君八行札紙尾不署名殘墨忽中  
輟展讀語未竟疑訝心自竊後附郎君言道是感  
微疾豈料疢作伏遂令絡上絕史記扁鵲傳下有  
破陰之紐上有絕  
陽之我方修報書君已成絕筆古人於知交夢寐  
路猶悉君胡不來歸使我見髣髴君伯常哭君老

淚日夜溢兄弟常哭君荆枝痛翦裂君婦與君子  
麻衣迸凍血怨氣層霄千哀聲九泉微人生到此  
境豈但書咄咄不如誦無生佞彼黃面佛傷君憶  
平生覩縷空紀實腹內轉車輪口中生石闕縱令  
墓木拱此痛焉可割魂兮如有知悲吟響寥泺不  
信牕戶閒煙氣尙勃勃

輓陳八懷祖二首

桑戶何緣遽返真如君怛化倍傷神良醫未許先

徵夢煩嬈居然敢殺人

淮南子傷死者其神嬈注嬈煩嬈善行祟病人腰

脚枉教身鬬健笑談長憶座生春

君健於步而雅善談笑分

明一別成千古回首鄉關只二旬

子與君別才二十日

西風吹淚寢門秋隣笛聲中感舊遊顧我閒身猶

汎梗憐君幻影已浮漚魂來白鶴知何日學究青

鳥不自謀

君善堪興術

一事泉臺心未慰問卿遺草篋

中留

君世父向山太僕有集若干卷君力任付梓屬梁山舟侍講校定未卒業而君遽物故人

感惜之

春日往來吳會之間得雜句十首

桃花新水漲春潭十幅東風力正酣但覺眼前濃

綠滿不知身已在江南

昨宵疎雨正霏霏餘潤朝來上衿衣怪底風吹香

滿袖蓬牕掠過野薔薇

盪槩吳娃手自摻隨舟雙燕語呢喃春遊總覺多  
穠麗一路飛花點繡帆

嘉湖處處箔蠶眠采得柔桑總趁鮮二百里中青  
不斷筠籠捆束壓船舷

綠樹村中磳碌場野田棱棱麥初黃無端誦得坡  
公句便有風來餅餌香

敲斜籬落繞潺湲知是誰家舊廢園猶有多情諸  
葛菜紫花如繡滿頽垣

水楊風葦雨紛紛路入前溪總莫分休恨禾中山



色少萬家春樹綠連雲

柴扉靜閉野人家扉外垂楊一向斜  
賺得行人回首看狂風吹落過牆花

年來蹤跡太郎當南北空看驛路長  
最喜王江涇畔水近前一步已家鄉

王江涇爲江浙交界處

小艇鳴榔喚賣魚就中尺素竟何如  
阿儂來往春江上但見烹魚不見書

侯門深

侯門深深如海沈沈之中有人在走卒傳呼聲響  
高從官驕貴容顏改雙扉照耀黃金鑲畫戟香凝

日日看三生未識蓬山遠萬里真同蜀道難可憐  
手版門前客但被豪奴雙眼白坐來箕踞不動身  
昨宵酒氣猶撲人須臾傳出門內諭大聲謝客教  
且去請看紛紛腰笏來此中那有君行處昨不見  
主人云是趨大府誰識金尊醉歌舞今不見主人  
云是案牘勞誰知睡起日上三商高豈不聞倒屣  
合向中郎謁結轡何妨廷尉屈人生何處無傲骨  
但願懷刺如禰衡不願埽門學魏勃

閨花朝詞八首

天公有意作花朝閨月花開景倍饒  
駸女癡兒無

賴甚紅羅重繫合歡條

朝來楊柳愈輕盈纖手攀條更有情欲插畫檐翻  
怪早未曾三月已清明

驚蠶小市喜過從撲蝶南園草漸濃盡說今年春  
事好教人兩度得相逢

常向花前酌一觴年年添爾好春光生來不信黃  
楊厄玉尺憑誰仔細量

九十韶光半已賒淺寒猶滯小牕紗一行擬乞金  
輪詔不是催花是祝花

添得名芳萬朶紅莫教容易過東風請看栖鳳梧

桐樹葉葉偏能記歲功

仙人十二住湖濱管領錢唐一歲春寄語鄉親蘇

小小瓣香先禮閨花神

西湖十二花神祠有催花使者并閨月花神

春山處處喚提壺令節傳來興不孤我亦生朝逢  
閨月碧桃花插當懸弧

春日雜句八首

乍暖還寒氣不齊小門微雨漉春泥繡簾只爲湘  
蘭放閒却銀鉤讓燕栖

潑眼風光爾許濃一牕新綠好房櫳落花抵死矜  
顏色裝點庭蕪學退紅

集本詩集卷之八  
朝來喜值養花時  
天與遊人氣候宜  
不日不風兼  
不雨譬如飲酒一中之

小院愔愔鐫曲廊  
流塵吹徧雜花香  
幾回欲賦薔薇句  
又恐人嫌是女郎

牡丹開出見精神  
多少名芳不當春  
惟有薺花偏照眼  
可知貧賤最驕人

池塘新水縠紋斜  
又見泥芹吐舊芽  
莫道人憐春色好  
游魚也愛食楊花

最憐茵潤雨無情  
空向閒階數落英  
萍葉自來還自去  
不知飛絮是前生

何須芍藥殿芳闌何必金尊薦牡丹只要穠春長  
在眼好花如海萬人看

王少峯司訓喪其愛子仲瑗哀悼無已仲  
瑗工書少峰繪臨池圖以寄思因題二律

門風自昔數龍優惆悵清才未許留長吉年華空

復爾

仲瑗歿年  
二十七

蘭成詞賦迴生愁衍波牋冷流塵

澀古錦囊虛墨瀋秋天上人閒渺何處只憑遺挂

一凝眸

兩髦誰復侍晨昏圖畫猶教筆法存虞殯聞歌憐

薤葉霜娥含怨睇釵痕

書家有薤葉  
折釵等名

倚闌人去雲

侵几洗硯池荒樹蔭門曲水潺湲無恙在好從君  
室賦招魂

少壯三好圖爲秦敦夫編修題

三好者音律書酒也禹鴻臚尙某爲汪  
蛟門比部所畫編修於揚州市上得之  
重爲裝池屬同人題詠

世閒樂事皆可好音律書酒概其妙三者之好亦  
不難難在一生年正少君不見公瑾顯曲稱郎  
童年東觀江夏黃青蓮酌酒勸龍飲不願富貴惟  
顏光齋梁宗老得此意蛟門先生踵其事一時將

去太不廉行樂終愁老將至繪圖豈必從人誇此  
念早動當時嗟年衰不但二事廢直恐觀書兩眼  
還麻茶此卷已過百年久幾度流傳好事手韓江  
太史得真好一旦熊魚且兼有圖長三文軸如杵  
珠玉琳琅紛滿口國初諸老盡軒昂當代名流  
亦奔走我慙末至似相如各各逢迎驚不朽虎皮  
之鞞桃枝杖欲向羣公趨左右護持也合貯葫蘆  
龍舉奇文同在肘吁嗟乎前人所好後人惜後人  
好藉前人力蕭公往事汪爲圖汪公遺蹟君今得  
多少前歡不可追惟有丹青尙堪識不知圖中之



事果有無或恐豪情虛粉飾不及君來按圖索分  
明提挈奉與君地下主人有妒色況君意氣力盛  
年玉堂早入爲神仙卽今羅致悉易事區區之圖  
何有焉若逢所好力須努莫如此圖過眼爲雲煙  
我生無俚不一辦翻以長貧成傲岸題詩長嘯疾  
捲還不見可欲心不亂

題趙公子鎮安小影

君不學范陽博物張司空讀書徑入瑯嬛宮又不  
學窮源去作乘槎客親向天孫乞頑石胡爲一葉  
凌滄溟牙籤萬卷堆縱橫操舟有女何娉婷初疑

蕩公之蔡姬又疑解佩之洛靈可憐皓腕嬌而輕  
安得乘風破浪力與蛟龍爭君家名父便便腹早  
日然藜校天祿卽今姓氏天下知日出博桑照暘  
谷公子清才美少年定有奇書等身讀他時瀛海  
是前程不怕神山風引速分明此意與人看故把  
奇蹤動遠矚披圖我亦生遐想便欲凌波共君往  
昔夢乘船日月徬海天萬里平如掌

聞外舅相國稽文恭公訃自揚州赴淮恭  
迓靈輜感懷四章

百丈橫牽上水舟望中丹旆黯凝眸台星圻後秋

霄冷岱岳頽時曉色愁上相音塵空赤鳥太平事  
業在金甌此來總是成虛謁嬾向旗亭數昔遊  
落拓天涯媿此身年來相見未因循幸非皇甫頗  
頻奏剩有淳于舊客秦崇讓宅寬容嬾臥平泉花  
謝不回春卽今一舸南流下翻遜涼華拂面塵  
玉堂人去竟如仙公最傷心是晚年謂時時侍  
讀之歎花  
影曉迷鈴閣外鳳聲寒墮禁池邊小車已絕中  
朝跡旅襯虛瞻故國天

聖主若容歸計早相逢語笑定成顛

津亭官吏候從容猶識淮壩兩世功畫舫旌旗齊

颭白沙隄燈火已虛紅淚斑盡染麻衣雪波影輕  
搖總帳風我是望公如陟岵不堪孤露卅年中

病瘧兼旬得十三斷句

瑟瑟初寒瘦骨侵寂寥真箇抱冬心怯風已作吳  
牛喘鎖徧紅牕屈戌金

窈窕羅幃藥氣濃曉來殘夢未惺忪日光三尺閒  
穿漏翻盡流塵一萬重

陰陽消息一時爭日日寒暄管送迎莫道病中無  
閱歷教儂嘗徧似人情

暗中僂指自疑猜怪底如期去復回顚顛一生江

水上病來也是學潮來

拳足低頭靜裏過休從方丈說維摩  
世閒還有牽機藥  
比校誰應惡趣多

客裏閒身不耐支幾番  
喋瘁費吟思  
髑髏手擲終何用  
齒冷當年老杜詩

居然僵臥比袁安  
藥竈茶鐺一室看  
黠鼠慣欺人不在  
銜鬚偷上小秋灘

硯名見天隨詩

病來鄉思苦難禁  
夢裏迢遙每自尋  
記得葛林園外路  
綠雲紅樹萬山深

日日長貧喚奈何  
敝衣東郭強行歌  
近來室鬼軒

渠甚旣笑劉龍又趙羅

名心早逐水東流多病懷人不自由寄語阿兄休

悵望對牀風雨待涼秋

明春北行不果先報家兄

鎮日長關白版扉故人蹤跡近依稀一羣凍雀慵  
於我立盡寒枝不肯飛

昨日支羸強下牀幾回小立倚清防西風也識先  
生懶代埽空階落葉黃

分明退院似僧伽隨意攤書到日斜安穩一團香  
絮枕南牕閒坐看瓶花

蔣璠亭學士偕同人遊焦山予以病後不

赴因呈學士兼柬諸君

大江岌岌吹西風船頭日壓寒潮空江天曉夕態  
萬變金焦離立江之中金山路近可數往焦山遠  
落煙空濛濛瑗亭學士動禪悅挈伴便欲窮其蹤我  
方病愈意瑟縮篷牕靜閉斜陽紅舊遊默記尙在  
目請爲一一陳於公我昔來遊當五月夏木千章  
森突兀雨來嵐氣綠于醅風動江波白如雪山根  
插浪萬枝瘦螳路穿雲二分闊絕頂都無鳥雀喧  
凌空乍見魚龍活飢餐風露腸亦冷夢繞煙霞魂  
不熟長松花細黃霧輕枇杷葉大濃陰潑濤聲夜

入廣陵寒帆影遙連滄海沒塵世難從歷劫看法  
王坐把千山闕山僧留我宿白雲桑下有緣竟三  
日拂座常疑衣角涼到家尙覺鞵痕滑七載於今  
一刹那勝遊難結豐干舌不如諸君茲遊更清絕  
十丈霜崖木葉脫足識深山此夜中布衾脚冷渾  
如鐵明日歸來向我說不須更乞太行泥但教攜  
取青田核

諸君中有嗜酒者故末句戲及之

次韻嵇笠軒武庫絢秋軒雪夜

琉璃燈照畫堂幽雪夜紅爐酒氣浮月魄護牕春  
影澹墨花涵硯凍痕流聚來鄉國休嫌暫話到生



涯每自愁擬欲扁舟同訪戴隔江濤白似輕鷗

晚仇一鷗廣文卽次其癸丑夏五夢故人

以終期見示醒後成詩六章原韻兼慰令

嗣錫蕃孝廉

一鷗名養正字荔亭乾隆丁酉舉人官桐廬訓導歿年五

十七

住世風花有夙因此生疑幻復疑真怪他天上頻  
爲記誰是人閒可贖身蓑袂再聯塵已隔蘭言一  
去座無春分明得句如官好休問當時苜蓿貧  
鬼籒掄來萬念懣此才天竟不相容及身未定千  
秋業問病原無二豎凶空谷佳人憐翠袖上清仙

手折芙蓉誰知笑語尊前在難向今生說再逢  
無端妖夢是邪非畢竟君從何處歸幻境語偏成  
左券悲歌淚欲滿靈衣寢門義重誰能釋宿草情  
深倍自依惟有啼鳥啼更苦霜寒孤影夜初飛  
鬢髮蒼浪本分官微名空自說寒酸耕田識字元  
非易成佛生天亦大難仙籍有人長注死神方無  
地得還丹文章對此真非忝論定何須到蓋棺  
共說先生自此昇懸崖撒手更誰能才華定是盤  
空鶴結習思爲附驥蠅事到虛無偏有準生來富  
貴竟無憑祇今煙月西湖地一舸同遊記昔曾

達觀心性本無驚來去惟憑一念明解脫定知離  
垢早養空長得御風輕眞靈位業應千劫文字因  
緣或再生地下諸公今袞袞不堪塵世獨經行  
半以來親朋下世者甚多

江波曲

春風來吹江波江波照我朱顏酡我顏今已老況  
復別離早沿江一路青青草不比故鄉春色好灑  
淚入江中水深淚亦深往來雙鯉魚識我思鄉心  
舉酒酌江中水冷酒不熱以酒比人情冷暖隨時  
別迢迢復迢迢江流千里遙歸心但逐江波去流

到錢唐自然住

和友人春晴病起用宋錢思公初秋屬疾  
韻

琉璃牕暖旭初紅喜見冰絃急  
欒桐攪眼乍疑花  
帶霧軸簾先怯燕迎風鑪香入座紫千篆階草依  
人聚一叢惆悵隔江春水綠故園書尙滯郵筒

簡松草堂詩集卷十三

錢唐張雲璈仲雅

烈女行

并序

烈女何氏父業漁許字同村李氏子未  
嫁而夫死女欲往守父母不許女潛自  
經未絕而得救父母防之嚴女亦若爲  
意解者伺父母他出乃投於水逆流至  
夫家門止而不動合村驚異之官爲申  
於朝得旌金山劉參戎徵其詩

謂婦身未嫁謂女身已許未嫁死何從已許生有

主女而不婦義別有取君不見巢縣何氏女

一解

何氏女李氏聘不幸妾夫死短命欲殉之以雉經

去嗟哉女兒太烈性非女性之烈恥有二姓

二解

父母驚救悲痛不禁淚下涔涔女陽爲平常以慰

父母之心其意轉深

三解

夫住西溪頭妾住東溪

頭夫家門前水妾家門前流門前水不流送妾還

上游生不入夫門死向夫門留至今溪水香至今

溪聲愁

四解

可以無死可以爲嬰兒子何以必求

其死而後止女曰矢靡他視彼中河

五解

朝廷

褒揚綽楔賞之士夫稱美詩歌獎之問女所生乃

在漁村古來奇節豈必名門

六解

曾賓谷都轉以牡丹命題校士安定書院

并自賦二律因次原韻

不假繁稱獨此花

洛陽於牡丹獨不名而直曰花見歐公花品敘洛中舊

許占豪華人閒富貴無真種春色文章是大家當  
檻儘教迎上客卷簾誰遣換名娃唐宮只解清平  
唱嚼徧深宵滿口霞

天公著意護花時特遣東風緩緩吹對面自慙形  
太穢賞心真覺酒難辭寒依綠幕三分雨暖颺朱  
闌百尺絲惟有侯門春似海一生行坐總芳期

疊韻

庶人真合比餘花

唐孫魴牡丹詩  
餘花似庶人

長共東皇領物

華三徑香縈荀令佩一痕豔入子都家亭臺何處  
容儋父歌舞應教貯館娃贏得玉溪狂太甚夢中  
彩筆已如霞

陡覺韶光勝舊時玉簫金管不禁吹一叢易損中  
人賦萬口爭傳幼婦辭芳樹暖融胡蝶夢繡簾輕  
颭海棠絲寒暄晴雨皆天寵分付尋芳莫後期

再疊前韻

早壓雕闌十二花使君於此賦清華生當玉價珠



聲裏開徧雲階月地家看殺未妨同衛叔吟成端  
合教吳娃只愁繡段當風起化作天邊五色霞  
講院詩成夾坐時墨香花氣兩相吹人生難得籠  
紗句天意方催織錦辭風外紅牙空有恨尊前綠  
髮已如絲十年遲暮江南客指點芳華是昔期

寓齋牡丹一叢主人貧失灌溉蕉萃日甚  
復疊前韻志慨

休說姚花與魏花鎮將蕉萃感年華托根原傍三  
千黛問譜虛傳六一家泥醉閒情憐坐客曉妝心  
事付隣娃已知不作瑤臺豔綺語何緣尙鬪霞

以不直堂言集  
年年孤負探芳時不惜狂飈特地吹天氣陰晴皆  
有意主人恩怨兩無辭熱心膾見蜂千點冷眼憑  
他柳一絲大筆如椽花似斗來春還與爾相期

相府蒲桃歌

外舅嵇相國文恭公邸第有蒲桃一株  
垂蔭滿院乃公數歲時手植也去年公  
薨爲賃屋者移根他處立枯死予聞而  
傷之因作歌以紀其事

相府蒲桃根似蠶傳自相公親手種相公在此纔  
弱齡七十餘年歲華共蛟龍拏攫庭之隅風雨終

年任卷舒千條慣舞流蘇影萬顆疑垂照乘珠中  
台星坼方逾載丹旄南歸遠言邁公子都依聖室  
居官僚空指沙隄在苑中早墮綠沈瓜隴上俄來  
元甲隊綠埜堂虛少客行平泉花冷無人對螢照  
徒從幽徑明燕飛時有重簾礙牕前鸚鵡綠無聲  
座上珊瑚紅尙碎賃春廡任別人來朝天漏向  
何時待庾信居然宋宅遊杜陵早動房池慨遽令  
小草失春暉不使清芬有遺愛葉葉還同路柳菱  
枝枝翻作甘棠敗我曾讀書此樹下小院房櫺最  
清暇每見春時起蟄根嫩綠離離堆滿架月中清

影過牆來雨後輕梢向空亞合教馬乳醲新醅一  
斛涼州夜光瀉豈知轉眼不堪看無復餘陰覆臺榭  
相公平生有清德物玩從來不少借定知此樹戀  
公恩同公榮壽還同謝我思手澤空怵怵未免  
今昔縈心情不及當年崇讓宅牡丹猶伴玉溪生

阻淺京口八晝夜排悶成篇

嚴冬江水落斷岸見千尺京口當此時淺露蛟龍  
宅千艘落釜底兩厓聳山脊大船空軒昂小船徒  
跼蹐船頭旋淤泥船尾閣沙礫去者不得行來者  
又復積危樯密如林飛鳥不展翮前方椿其喉後

乃摺其肋地無華離寬道維弁中窄日望兩度潮  
賴此朝與夕一聲唱邪許鼉鳳齊作力千篙撒雨  
點萬目伺駒隙欲行旋復止乍通還更塞既經羊  
腸細更溯鳥道直用短兼用長取順不取逆未肯  
貫魚游時爲並馬勒競排頭如龍攻堅腹比石若  
觀鉅鹿戰諸侯皆在壁若燭牛渚怪然岸照水赤  
晝夜時無寧去住計何適欲如牆而進忽中道自  
畫守株非待兔過都擬退鵬交馳心憧憧愁對語  
默默東船或連牀西舫疑度陌雖同比隣居毋乃  
他族逼忽然鳴鉦來錦纜牽畫艦映山有黃帽頗

帶騎橫色傳呼驅其曹衆人皆辟易謂將掉臂行  
可以解結轡退步仍故處也復共偈仄我欲呼靈  
胡來作巨掌擘更乞陽侯波決彼東海澤國無寧  
長風高挂十丈席旁人驚我言相顧盡嘆嗟不見  
浮槎人本是吾家客會當踏鼉鼉凌視萬頃碧

雪閨詞十首

漠漠同雲壓四檐開門長怯朔風尖謝家庭院蕭  
閒甚冷絮飛來濕畫簾

雙袖禁寒手自韜試停鍼綫看鷺毛不知滕六多  
相妬也向風前鬪剪刀

怯寒常覺曉妝慵  
點額飛雲態更濃  
不用桃花顰  
兒面生來兒面本如儂

外傳閒繙寫豔詞  
幽情此際有誰知  
趙家姊妹凝  
脂暖夜半寒消疹粟時

庭樹封條似玉塵  
鴛鴦瓦冷沒魚鱗  
朝來烏爪寒  
逾甚難幻瓊鑪一握銀

對鏡呵寒淺  
暈生帳煙腮霧不分  
明檐牙冰筍瑱  
琤落錯認妝臺碎玉聲

一院濃陰不耐寒  
迴廊幾度怯憑闌  
只愁翠袖難  
重倚壓損牆東綠數竿

梅花輸白鬪精神折得花枝索笑頻自有冰肌比  
姑射不須綠萼說前身

透閣香芸展一編烏絲自熨冷金牋呵來綵筆如  
蘭氣短賦簪花寫惠連

嶺山甜味劇清寒收取銀罌一斛看留與檀郎醒  
卯酒石鎰融素滄龍團

嘉慶元年元旦恭紀得嘉字

閭闔門開萬物嘉從頭周甲數無差紀來謨典惟  
元朔喜見勲華是一家海宇共瞻新日月吾儕空  
臥舊煙霞橫牕梅萼迎春早昨夜南枝盡放花



德州大雪

長途疲馬久虺隤，奈此西風急雪催。  
荒店不堪傾濁釀，故山何苦負寒梅。  
重衾欲戀難成夢，殘蠟無心祇自灰。  
惟有征鴻如舊識，相看泥爪又飛來。

都門寓憫忠寺

又從蕭寺寄浮蹤，閒地何妨暫放慵。  
戰骨久隨唐碣冷，佛龕長對蜀花濃。  
寺中海棠最盛難將塵劫消殘奕，祇覺名心媿曉鐘。  
不敢留題向僧壁，他年應乏碧

紗籠。  
籠字從唐韻

三月望後見杏花有感

枝頭春意尙輕盈翻共天桃笑靨生三月著花嫌  
太晚一生於我似無情早逢紫燕憐知己長對虹  
釵憶舊盟多少曲江心事客折來惟愛說佳名

法源寺海棠盛開馬秋藥比部來賞復邀  
過崇效寺看海棠同作

輾紅十丈塵飛揚閉門有客如顛當已無鍼砭到  
俗耳那復冰雪催詩腸幸居蕭寺頗不惡中有海  
棠最綽約鹿女簾櫳曉夢醒象王樓閣春陰薄分  
明定惠院中來惟有東坡能領略馬君秋部吾老  
友散直來遊還命酒乍逢絕豔驚照眼更說名芳

不去口名芳亦在招提家城南古刹題棗花

鼎效寺俗

名棗花寺攜朋聯袂遠相訪綠莎細碾輕輪車入門風

景正清美小闌日午蜂成衙一重兩重漾春霧千

片萬片浮朝霞三千諸佛鬪瓔珞十二美人披絳

紗絳紗捲起天風大只恐紅肌吹欲破安得楊枝

化雨來門外春寒如水過我生本在明湖邊又住

揚州二十年雲階月地等閒事對此翻覺心悄然

人生快意不數觀日日看花扉屢扣忍草禪枝好

護持莫使肥環容易瘦

都門過外舅櫺文恭公故第有感二首

曩時甲第數街西此日朱門望轉迷相業久經看  
墓碣居民猶是說沙隄賞花人憶裴中令制淚吾  
同李玉溪三十年來甥館客不堪重覓舊留題  
嬾眠街裏幾逡巡猶是當年落魄身栖宿曾爲堂  
上燕徘徊誰問路歧人火城殘燭虛無影銅鑰題  
封舊有塵老屋區區留不得而今方識相公貧時第宅已屬他姓

逐虎行

猛虎在深山其威不可當氣欲食盡千豺狼豺狼  
一嚙不到口但向人家搏雞狗人惜雞狗不惜虎

逐虎豈復畏虎怒虎亦貼耳歸山中喪盡虎威莫  
敢侮此虎見小不見大一蹶從今無用武雞狗聞  
之喜而舞公然視虎如視鼠

下第出都馬秋藥比部以詩贈行留別四

首

落花一陣過閒門飄泊人同此日論豈敢冬烘常  
致誚可憐春夢太無痕秦書十上辭終費宋楮三  
年巧不存翻覺青袍長似草相看還有舊時恩  
霧閣雲階未許攀此來依舊落塵寰書通闥苑憑  
誰附風引神山又自還萬事總如紅勒帛一生難

解玉連環閒身分與清華隔留得年年傲骨頑  
升沈一例苦忽忽但覺雲煙過眼空此事何分牀  
上下當時竟判水西東胭脂色冷原難畫鸚鵡言  
多未是工惟有憐才山吏部臨歧每爲惜途窮  
柳花吹滿鳳凰城又聽驪歌送客行一第未完寒  
士局千秋還藉故人名江雲指路先愁遠燕樹回  
頭倍有情夜夜天邊看列宿憶君吟興尙縱橫

荒村

才丁孤村路荒涼動旅愁巷應稱馬糞車或挽羊  
頭屋小人如蠶田燕麥未秋不堪殘照裏一宿竟

難投

柳株歎

剝柳皮掘柳根根有芽蘖無一存賣柳得錢謀饗  
飡風吹太陽紅皎皎行旅不蒙覆被恩道旁堡房  
大如斗盜賊柳株皆所守更有柳長列姓名粉壁  
大書曰某某不知職司竟何事遂使無端遭擊剖  
忽然兀立如夜叉又復臥地如龍蛇焦枯似遭楚  
人炬朽敗不中張鷟槎日昨驅車過汶上高柳兩  
邊鬱相向其餘樹色皆茂悅下有黃雲翻麥浪此  
邦刑政必肅清約束吏民無橫行從來入國先問

禁卽此可知官有聲我聞樹人之計同樹木行列  
表道古所蓄摧殘到此令人恨官長過之不留目  
舊者已盡新不補放眼長隄無一綠嗟哉此責何  
所寬我不怪民當怪官

詠小車十二韻

車小稱名易輪輕製作便奇原先自偶偏乃勝於  
全中作單心運旁惟兩翅聯端居騎鶴背並坐切  
鳶肩後藉雙趺力前憑一革堅  
挽小車者以一牛皮橫於頸 乍  
敬頭屢掉小住趾應顛陟阪高岡馬緣坡下瀨船  
但愁泥滑滑更怕石淺淺轂轉聲如語途循轍似



弦挂帆風借勢挽索水同牽遠岫隨時望斜陽自  
在眠定張名字好嘗憶攷工篇

定張車見攷工記  
注蓋卽今之小車

### 晚景

晚景有濃色一鞭村路閒積雲平似屋高柳綠干  
山白鳥天邊去鳥健沙際還歸途多浪跡差喜客  
愁刪

過兗州南樓回憶甲辰歲與嵇久之司馬  
賦詩話別於此忽忽十三年矣時久之方  
丞滋陽今且佐大郡而予尙困計偕不勝  
今昔之感爲賦一律卽寄司馬

兗州城闕望嵯峨會記停驂此地過歲月久隨人  
事改雲山猶戀別情多三秋鵬翮誰軒舉一劍龍  
淵已嬾磨我論文章君政治尙期相見勉蹉跎

南沙河道中微雨車中甚涼適

燕翅掠微雨馬頭生夕陽數重嵐色淨夾路棗花  
香地近南中潤人依水北涼今宵眠食好相顧免  
思鄉

南歸雜詠二十首

二十年來說壯遊而今蹤跡尙浮漚一生慣與人  
爭路除却楊花不解愁

陸放翁句楊花慣與人爭路

幾經襪被出脩門衣上黃沙舊有痕贏得識途如  
老馬又聽鈴語記朝昏

謠詠憑他衆口傳文章聲價亦非天分明說道驪  
珠顆魚目拈來也自圓

只道仙源別有天迷津重到竟無緣自從賺殺漁  
郎後但遇桃花莫近前

客裏驪歌唱未休并刀難翦是離愁三千丁字沽  
前水直到長江不斷流

津門別兄

六年三度見應難雙袖猶餘淚點乾頭白天涯兩  
兄弟悞人生計是微官

熟罷黃梁夢始清昨從旅邸笑盧生阿儂不願曹

騰睡放眼邯鄲道上行

旅舍壁閒見有詠黃梁事者此首卽用其韻

不貪華廬不逃禪不羨長生不愛官只要一椽歸

去早金牛湖上話團樂

除却科名不是真掉頭歸去豈無因此身已落蓬

山外願作牛欄豕柵人

如此人才奈老何堂堂歲月隙中過得歸未是閒

歸去尙有千秋事業多

躍馬平原驛路長傳來故里是東方先生如此風

裁好只共侏儒粟一囊

東方先生故里在今德州在平之閒道左有碑

如雲冠蓋忽相逢邑令傳呼有盛容寄語使君休

太喜防他齒冷蔡興宗

兗州道中逢滋陽令

馬上涼風暑氣微棗花香重撲人衣行來忽覺前  
村暗四面槐陰綠打圍

連朝嵐色幾回經相對終嫌少畫屏忽見嶧山驚  
照眼一堆濃壓馬頭青

北來雨少頗妨田黿坼庚庚劇可憐畢竟近南天  
氣好繡塍如水綠無邊

兗州以上殊憂旱氣

昏昏客思在天涯忘却長羸晝景嘉野老教人知  
節物土牆亂插錦葵花

古井何容再起瀾漢陰雖巧亦無端客中更覺機  
心少閒看蜨蛸轉一九

相看仍是舊行蹤車馬紛紛日又逢莫道此來多  
落魄也如流水也如龍

記得春初風雪侵卽今無雨但輕陰歸時總比來  
時好便算天憐蕩子心

長亭一度一停驂回首前期總不堪此日津門應  
念我計程知己近淮南

順水舟行而風勢甚逆作長歌以自遣

皇天有心示大公欲令平分水與風以順濟逆逆

濟順彼此皆得貪天功天之此意良獨厚惟我所  
遭殊不同自從北來困車轍乍親舟楫祛塵容駿  
馬走阪箭離筈急流下趁長淮東淮揚相距三百  
里晝夜可達非忽忽我生萬事不快意行止悉在  
淹留中一春蹤跡更蹇滯得歸或可舒心胸春初  
過此水旣阻石郵又復從而攻此來準擬放溜去  
欲補缺陷誇遭逢東風無端怒如虎打頭濁浪排  
千重風師力挾河伯走長波倒瀉馮夷宮小舟牽  
挽不得上有若巨艦浮艤舳來船不知水本逆抽  
帆十丈淩虛空果然使船疾於馬令我見此心爲

仲吾才不稱船下水天或致誚文非工箋天乞賜  
轉旗脚再拜顙請天如韓隣舟聞此絕纓笑斯語  
母乃非名通天豈有意困羈旅此行子適當其衝  
來船亦復有何罪倘如子請將誰從當由坡語下  
一轉人厄旣久成天窮我媿隣言殊默默爽然兀  
坐掀孤篷行當堅忍俟其變不怕七日風終融

埽地二首

縛得樓毛不用錢藥闌花檻試輕便笑他股栗成  
何事齊相門前早自憐

獨對明牕自展書客中也復愛吾廬陳蕃枉欲安



天下一室猶難力埽除

李嗇生同年用予出都韻見贈四章再疊  
前韻奉酬

三月長安獨閉門得歸文字喜重論難消元亮心  
中熱慣看方平背上痕客路輪蹄空有恨故園松  
菊久無存賣漿屠狗英雄事只是生來未受恩  
龍鱗鳳翼迴難攀一念何堪落九寰豈羨泥金書  
寄捷只愁殘錦夢探還鮎魚仕宦空逢竹黃雀恩  
情孰報環留得二分明月地可容長此住疎頑

荒雞中夜唱忽忽太息春風事又空鄉思終年天

轉左名心萬折水流東  
裴頭黃尾看何限  
滋賦誠文總未工  
底用車船資五鬼  
此生只坐命先窮  
擁得殘編似列城  
策勳空說壯時人  
如王粲登樓日  
詩占邱爲落第名  
蠻觸屢煩金闕詔  
蟲沙長繫玉關情  
書生萬事成孱弱  
也擬從軍一槩橫  
時兩湖未靖

嗇生教授勘沛邑戶口歸示沛行草因題  
其後兼感故沛令馮獻廷同年

馮名封錢唐  
人庚寅

舉人

酸風苦雨涼秋九先生捧檄河壩走河壩有縣古

沛豐高建黃流如瀉乍今年六月水力酣陽侯倔  
強馮夷貪北隄漫決遽及沛城所不沒惟版三哀  
哀中澤號鴻雁大吏封章不敢慢 賜將百萬水  
衡錢半救民飢半水患口分手實事不同此中或  
慮姦蠹蒙特檄先生核其要傳車肅肅生清風先  
生一管生花筆按籍持籌記注密先生一片錦繡  
心剔弊釐姦鉅細悉寬鄉狹鄉自可均主戶客戶  
惟吾民先生對之頌屢蹙我視爾輩皆同仁荒煙  
白浪浮平野日日衝泥泥沒踝平生不屑百里侯  
此意常如萬閒廈公事旣畢乃敢私私者何事惟

有詩感時紀實非漫及弔古懷人兼有之此邦舊  
令馮明府與我同年今作古沛人至今有遺愛歸  
述傳聞我心慙馮公身去無留貽更聞伯道嗟無  
兒迢迢丹旄二千里廉吏從來不可爲嗚呼廉吏  
從來不可爲先生自言見已早不信請看沛行草

新寒

秋風一夜到江城已覺新寒似水生牕霧乍迷侵  
曉夢扇紈又抱隔年情黃花對酒剛三徑白髮添  
絲更幾莖最憶天邊稻梁雁暮雲無際自長征

貞孝黃孺人詩

閨中奇事那有此不能嫁生能嫁死天倫缺陷天  
亦窮力補還憑一女子從來危苦惟所安我爲一  
一思其難烈婦難難於傷肌刻骨身名完節婦難  
難於飲冰茹檠摧心肝二者之難皆理義理義總  
由情所至不知貞女之心又何冀上無 朝廷令  
下非父母意冥然獨自行其志嗚呼此事誠不易  
夫雖有妻不及娶妾爲鬢髻作新婦夫本有母不  
能養妾爲承歡侍無恙夫旣無婦安有兒妾爲繼  
嗣延其支孀姑含飴兒力學兒能娶婦母心樂兒  
且食餽事更足回憶深宵就紡車首似飛蓬指血

漉已斷之綫行復續已寒之骨今且肉何以報之  
綽楔蟲 朝命一下光厥族四方聞之動色告重  
疊篇章如筍束三十年來完此局貞女從茲享遐  
福貞女誰黃孺人適者誰真州陳煌煌姓氏垂千  
春

題李嗇生所藏黃松崖先生詩冊手蹟

報國猶然未仕身不將科第負明倫憐才豈藉錢  
蒙叟抗節曾同史道隣百戰山河歸 聖代九  
原文獻泣黎民一編殘墨憑誰守終仗先生故里  
人

## 倡樓行

閶門楊柳大道旁高樓中有邯鄲倡行人過者增  
太息等閒不上盧家堂裘馬翩翩貴公子金鞍玉  
勒來遊此生處原從紈袴生死來只願溫柔死誰  
言公子好容色除却倡樓人不識誰言公子意氣  
高除却倡樓不是豪由來身世居華膺笑擲黃金  
賤如土已將心力盡臯盧更遣閒情事歌舞歌舞  
場中歲月賒倡樓久住欲爲家不見美人心似棘  
但見美人顏如花願將身作韓熙載但向人誇綠  
萼華幾度緩歸忘陌上居然蕩子落天涯公子頻

年得美宦共說纏腰十萬貫入座都無北海尊壓  
裝但有南山絹鑑開金獸麝蘭煙地蹙錦衣紅繡  
段燒殘絳蠟淚三升聽罷嬌喉珠一串不識閨中  
少婦愁那知門外貧兒歎歸去徒看私橐肥興來  
盡作纏頭散人生富貴是逢場眼底年華竟虛換  
秋月春花樂不支牀頭金盡未歸時漸教粉黛回  
眸嬾更覺紅羅出手遲從來樂事原難再六州鑄  
錯應生悔依然心性愛繁華前途特有高官在

丁巳上元日喜家兄于役清江暫歸揚寓  
復送還津門二首



一檄淮南路他鄉月正圓風塵杯酒外兒女夜燈前  
權自因歸急牀還得暫聯小園花事好喜及早  
梅天

仍是忽忽別驪駒挽不留重將兩行淚并數七年

愁

兄自庚戌歲去揚

文墨無青眼功名易白頭朔風吹雁

影各爲稻梁謀

寓齋舊有牡丹已萎今春補種一叢紀之

以詩復用前年曾使君韻二首

貧賤偏栽富貴花茅堂也許見繁華連朝寒意還  
如水一夕春風忽到家鄉思不堪吟越客靚妝何

眉對吳娃挽回造化須人力照眼驚看五色霞  
種花兼得養花時東面風輕緩緩吹費我百分金  
谷酒輸他千首玉臺辭坐來乍覺香生袂老去惟  
嫌鬢有絲一樣尋常舊簾幕自應回首說前期

題高實菴表兄湖壩春曉圖六首

廿年清夢繞西湖畫到家山願已孤今日看君行  
樂地思歸重展舊時圖

予有思歸圖曾辱兄題句

六橋十里種垂楊岸岸花光接水光生在湖邊天  
也妒硬差此老住他鄉

近遊君本暫盤桓歸去惟應我最難不道又同江

上客湖山都讓別人看

除却明湖不當春遊情空想大隄塵風前鬢影離  
離白只恐桃花也笑人

休從畫裏說句留振觸心情是舊遊莫更寫將楊  
柳色有人長抱翠樓愁

兄有姬人故戲及之

相逢空數釣遊時此景年來我自知安得從君單  
舸去湖塘唱徧冶春詞

予舊賦冶春詞一時和者甚衆

宿燕四首和高邁菴表弟

繡樓

金鴨香殘燭颺銀高樓初斂舞衣塵繡繡光動迷

離影羅幕寒。餵料峭春。繫足已煩連理綫。並頭只  
傷比肩人。玉籠尙有紅鸚鵡。昵語休驚好夢頻。

書室

蕭齋十笏穩。簾犀爲護紅襟好。共栖門掩梨花留  
夜月。屏閒琴軫。綴香泥。茶鐺火宿巢。應煖書幌燈  
迴睇。漸迷惟有苦吟人。不寐輸他雙住杏梁西。

田舍

誰家百姓太尋常。不稱輕盈並體藏。居傍桑麻憐  
白版。夢遊臺榭卽黃梁。攜將雛影依篝火。驗到巢  
痕有稻香。幾度茅檐栖未穩。夜深機杼尙連牆。

僧寮

晚鐘初動識歸心青豆房間倦翮臨竹外一龕同

佛占

王摩詰有燕  
子龕禪師詩

燈前雙影背幢深煙飄篆縷猶

慵翦花破禪關已嬾尋如此安巢徵定性愛聽宵  
梵落空岑

詩冢歌

并序

無錫顧晴沙先生選其里中詩自漢魏  
迄今千餘家共五十八卷已付梓矣將  
毀其牘藁其里人賈君素齋請瘞諸錫  
山之麓立碑其上號曰詩冢邀名流會

葬誠一時佳話詠其事者甚衆予以翻案立論未免唐突亦以備一說云爾

君不見萬山下沈石一片當時誰識征南面千年而後或在山陵谷從來有遷變又不見唐求山人一个瓢貯以詩藁江中拋爲祝斯文不沈沒得者自識吾心勞從古名心不肯死姓氏長教堆故紙骨雖已朽力可爭所志區區只在此晴沙觀察光操選政隱然以詩爲性命對此如逢桑梓恭采來似奉輶軒令選詩旣畢還梓詩梓之不盡終有遺錄取精華置糟粕其詩自在當聽之欲將賸藁投

水火素齋居士 崧言不可請從劉蛻文冢例藏以

元宮位置妥一抔黃土函精英深山夜黑風雨驚

青燐熠熠來相迎冷光閃爍如有聲如有聲不能

語多年故鬼小於黍禾于寒空淚如雨吁嗟乎文

字潛幽氣不滅漿酒寒澆心尚熱請看一字二字

閒猶是千痕萬痕血我聞嘉會惜未逢今請一言

陳賈公昔人有詩集會藏佛寺中何不將此置之

龍光塔

錫山塔名

阿護仗彼諸天功旃檀香辟蟬蠹走

波羅巾拂煤炁封安知五十八卷無人續來補先

生所不足不教滄海有遺珠更遣藍田還種玉沙

中再揀幾番金椽外時逢一枝竹但令死作燄如  
虹莫便生將劒埋獄我願告君速啟壻定有精光  
一齊放得書不比汲郡人發邱且學中郎將

溽暑困人思得一高閣環以古槐疎柳巨  
竹百十挺几簟涼生鬚睂綠映閣中列素  
心蘭數盆幽香沁脾日偃仰其中亦塵世  
中一清涼界也區區不予畀能無慨然

萬事不快心一意動遐想常時居戶限何處脫塵  
埃神形固局促意氣殊骯髒苦吟髭屢斷著書屋  
徒仰欲拊雲將髀空露華陽額況當溽暑來舉室



如在網陽鳥下空庭一駐不復往但覺南風薰殊  
乏西山爽雲氣不觸石雨意惟潤礫漿汗流震霰  
垢體膩剗磳窰將六合烘廈少萬閒廣人來憎襪  
襪吾意苦惆悵思得一高閣面面軒櫺敞槐蔭蔽  
檻垂竹色干霄上濃陰四圍合日氣一綫潑疎如  
綠羅屏厚比碧油幌茶煙繚以曲墨光冷而晃涼  
颺動葛衣不數仙鶴擎蘭如素心人來就塵外賞  
幽香流几簟森翠列盆盎此時炎熇氣驅之落莽  
蒼快學美芹獻喜等敝帚享事難語流俗樂可共  
吾黨吾黨有達者大笑撫其掌此中有清福子意

母乃罔不見富貴人名園儼在牕終歲不一涉日  
逐名利鞅今子何人斯而欲勝地攘靜爾方丈室  
絕爾中心快但能除結轡奚必更塏壞我聞斯語  
快如背去奇癢居然北牕涼獨見羲皇象

長歌訓家友棠孝廉見投之作

我家住城西君家住城東君家門前之春風吹我  
屋上花枝紅一條直路朱絃同終年相隔不相逢  
有時理雙屐去訪君行蹤君行又隨白雲出園門  
煙樹春山空君亦竟不來我亦竟不往相思復相  
思芳草隨時長青青直到門一路平如掌昨朝投

我函封字似訴頻年不得志頻年我正坐奇窮更  
爲君言不平事男兒生自當封萬戶侯明珠翠羽  
黃金裘賜書屢下丹鳳闕揖客只在銅龍樓不然  
便當傾盡詞源水橫掃千言馬可倚百金賦買長  
門宮千縉琴碎宜陽里胡爲局促居戶牖獨抱丹  
鉛驚老醜碧落曾誰識面來紅爐空作還丹守元  
結愁爲賤士吟楊朱泣向歧途走種來蒿莖已傷  
時開到萑蒲詎能久三年名紙自生毛一柄長鑱  
猶在手事去難逢萬里裘時來或享千金帚有書  
不上光範門有杯但酌新豐酒人生如是事亦偶

富貴於身竟何有君居故鄉猶可憐我望故鄉如  
在天一客揚州二十年揚州舊事吾能詮豈不聞  
惠照寺中木蘭院王播題詩塵滿面寄食空慙飯  
後鐘後來人向紗籠羨又不聞樊川杜牧客幕府  
夜出青樓擁歌舞奇章潛遣相護持日報平安誰  
敢侮二者作客皆此鄉佳話至今名姓揚我今寓  
此何落落知己官階兩無著倘逢路鬼定揶揄若  
遇詞人敢陵轢君才自具魂壘胸我亦有餒如長  
虹會當奇氣同一吐君作雕龍我繡虎

長孫餽隨其父讀書杭州詩以勛之并送

其行

爾年一星終生長在羈旅未飲故鄉水但諳故鄉  
語故鄉有戚友道汝頭角舉豈知逾幼學癡頑尙  
如許昔有漢朱勃衣方而步矩馬援一相見意輒  
爲之沮北魏有祖瑩篝火事攻苦呼爲聖小兒名  
譽邁童豎汝年與之齊汝智難與伍性情易嬉戲  
講解或鉏鋤今隨父還鄉從此力須努倘從明師  
遊聽受莫更迂束身赴庠塾刻意通訓詁高曾邱  
隴間恭敬陳尊俎父黨與母黨進退戒莽鹵唯諾  
必謹慎周旋要容與立則足毋跛坐則頭毋俯母

跼蹐而趨毋蹉蹕而舞毋作壞面笑毋動褊心怒  
恂恂輩學中切磋兩爲輔遇強莫相狃遇弱不可  
侮淵明有諸郎訓之尙勸讓雜誦賁子詩言足銘  
肺腑況汝本常兒焉可忘愚魯汝生未相離去去  
吾意慙歸雖無一椽汝姑定憐撫旣以進學業又  
復返故土此樂豈易逢翻覺吾羨汝

詠史

賊人多官兵少賊殺人如刈草初時賊畏官官來  
賊退事卽完後來官畏賊賊來官退賊愈逼星星  
之火能燎原涓涓之滴成巨淵本期撲滅在旦夕

豈料毒流經歲年百姓流離幾曾慣生長承平不  
知亂無端忽入鬼門關賊殺一半官一半賊殺一  
半官不知官殺一半當賊算有如驅猛虎但敢譟  
逐不敢迂又如捕飛蝗死者無幾生者翔兵死百  
人以一報賊死一人以百告一片沙場肝腦塗戰  
功還被他人冒巍巍大府居上游牙旗玉帳千貔  
貅窮追既少斫足馬衝突更無燒尾牛揚兵難爲  
子儀計灌芻豈有睢陽謀公然縱賊使之去滋蔓  
一任隣封憂若教按以失律罪其罪當比輿尸浮  
嗚呼烏合之勢何時止豈必武臣不惜死君不聞

列鎮盡如周將軍此輩那能飛至此